

▲ 题图 宋（传）马远 林和靖图

本期主持：Patrick

01

梅花九首 其一

瓊姿只合在瑤台，誰向江南處處栽。
雪滿山中高士臥，月明林下美人來。
寒依疏影蕭蕭竹，春掩殘香漠漠苔。
自去何郎無好詠，東風愁寂幾回開？

Credit to Patrick

02

梅花九首 其二

斷魂只有月明知，無限春愁在壹枝。
不共人言唯獨笑，忽疑君到正相思。
歌殘別院燒燈夜，妝罷深宮覽鏡時。
舊夢已隨流水遠，山窗聊復伴題詩。

Credit to Patrick

青丘子歌

江上有青丘，予徙家其南，因自號青丘子。閒居無事，終日苦吟，間作《青丘子歌》言其意，以解詩淫之嘲。

青丘子，癯而清，
本是五雲閣下之仙卿。
何年降謫在世間，向人不道姓與名。
躡屩厭遠遊，荷鋤懶躬耕。
有劍任鏽澀，有書任縱橫。
不肯折腰為五斗米，不肯掉舌下七十城。
但好覓詩句，自吟自酬賡。
田間曳杖複帶索，傍人不識笑且輕，
謂是魯迂儒、楚狂生。
青丘子聞之不介意，吟聲出吻不絕咿咿鳴。
朝吟忘其饑，暮吟散不平。
當其苦吟時，兀兀如被醒。
頭髮不暇櫛，家事不及營。
兒啼不知憐，客至不果迎。
不憂回也空，不慕猗氏盈。
不慚被寬褐，不羨垂華纓。
不問龍虎苦戰鬥，不管烏兔忙奔傾。

向水際獨坐，林中獨行。
斫元氣，搜元精，造化萬物難隱情。
冥茫八極遊心兵，坐令無象作有聲。
微如破懸虱，壯若屠長鯨。
清同吸沆瀣，險比排崢嶸。
靄靄晴雲披，軋軋凍草萌。
高攀天根探月窟，犀照牛渚萬怪呈。
妙意俄同鬼神會，佳景每與江山爭。
星虹助光氣，煙露滋華英。
聽音諧韶樂，咀味得大羹。
世間無物為我娛，自出金石相轟鏗。
江邊茅屋風雨晴，閉門睡足詩初成。
叩壺自高歌，不顧俗耳驚。
欲呼君山老父，攜諸仙所弄之長笛，
和我此歌吹月明。
但愁欵忽波浪起，鳥獸駭叫山搖崩。
天帝聞之怒，下遣白鶴迎。
不容在世作狡獪，複結飛佩還瑤京。

Credit to Patrick

爾牛角彎環，我牛尾秃速，
共拈短笛與長鞭，南隴東岡去相逐。
日斜草遠牛行遲，牛勞牛饑唯我知；
牛上唱歌牛下坐，夜歸還向牛邊臥。
長年牧牛百不憂，但恐輸租賣我牛。

Credit to Patrick & CC

05

客中憶二女

每憶門前兩候歸，客中長夜夢魂飛。
料應此際猶依母，燈下看縫寄我衣。

Credit to CC

06

天仙子 秋夜客中

炙了青燈初掩帳。
四壁蛩鳴催旅況。
瀟瀟索索雨兒來，
梧葉上。柳葉上。
兩處秋聲愁一樣。

此夜江雲迷疊嶂。
好夢欲歸難倚仗。
已涼未冷惱人天，
眠一餉。坐一餉。
白髮明朝應幾丈。

Credit to Yolanda

07

東飛伯勞歌

前飛蜻蜓後飛蝶，桃葉楊枝每相接。
誰家季女弄春妍，披煙映日窗戶前。
金雀雙釵翠羽扇，纈屏繡帳文羅薦。
嬌羞年幾十五多，將呈複隱奈愁何。
流暉倏沒百花暝，空持可憐誰作並。

Credit to Ruby

08

余氏園中諸菜十五首 菘

秋深毫晚出，齧脆如鳴玉。
醒灑策奇勳，冰壺浸寒綠。

Credit to Yougeng

特别感谢Patrick提名，Patrick、CC、Yolanda、Yougeng、Ruby参与选诗。